

Morning Dogri (NSD) National News Bulletin 21-09-2024

आकाशवाणी

1. प्रधानमंत्री नरेन्द्र मोदी होर अमरीका दे त्र दिनें दे दौरे लेई रवाना होई गे न।
2. आतिशि होर दिल्ली दी मुखमंत्री दे तौरा पर अज्ज सगंध चुकगन।
3. केंद्र ने जमीन दे बदले नौकरी घोटाले सरबंधी मामले च आरजेडी दे नेता लालू प्रसाद यादव खिलाफ मुकदमा चलाने दी मंजूरी देई दिती ऐ।
4. श्रीलंका च राष्ट्रपति चुनाएं लेई मतदान जारी।
5. हैजबुल्लाह नै बैरुत दे दहिया इलाके च अपने शीर्ष कमांडर इब्राहिम अकील दी मौत होने दी तस्दीक कीती ऐ।
6. भारत नै बुड्डापेस्ट च खेड्डी जा'रदी चैस ओलंपियाड दे 9में गेडु च उजबेगिस्तान खिलाफ 2-2 कन्नै मैच ड्रा खेड्डेआ ऐ।

<><><><><><>

PM-US

प्रधानमंत्री नरेन्द्र मोदी अज्ज अमरीका दे त्रुं दिनें दे दोरे पर रवाना होई गे न ते इस दरान ओह् उत्थें केई उच्च स्तरी बैठकां करगंन। मोदी होर विलमिंगटन च क्वाड नेताएं दे चौथे सलाना शिखर सम्मेलन च हिस्सा लैने कन्नै अपने इस दौरे दी शुरूआत करगंन। इस शिखर सम्मेलन दरान सदस्य मुल्खें आस्सेआ जलवायु परिवर्तन ते नमीं उभरदी तकनीकें सनें केई मामलें पर चर्चा कीती जाग। प्रधानमंत्री मोदी होर अमरीका दे राष्ट्रपति जो बाइडेन हुंदे सने क्वाड समूह दे होरने सदस्यें कन्नै दपक्खी बैठकां करगंन। अमरीका दे दौरे लेई रवाना होने शा पैहले जारी इक ब्यान च मोदी होरें आखेआ जे ओह् अमरीकी राष्ट्रपति जो बाइडेन, प्रधानमंत्री अल्बनीज ते प्रधानमंत्री किशिदा हुंदे कन्नै क्वाड शिखर सम्मेलन च मंच सांझा करगंन। उनें आखेआ जे क्वाड समूह भारत-प्रशांत खित्ते च रमानदारी, तरक्की ते खुशहाली लेई कम्म करने आले इक महत्वपूर्ण मंचदे तौर पर उभरियै सामने आया ऐ। राष्ट्रपति बाइडेन हुंदे कन्नै बैठक बारे मोदी होरें आखेआ जे इस बैठक राएं ओह् भारत ते अमरीका बश्कार कुल संसारी रणनीतिक, सांझ भ्याली गी होर तगड़ा बनाने दी कोशश करगंन। एह्दे परैंत

मोदी होर न्यूयार्क जांगन जित्थें कल ओह् भारती समुदाय दे लोकें गी संबोधत करगंन। मोदी होर आर्टिफिशल इंटैलीजेंस, क्वांटम कम्प्यूटिंग, सेमी कंडक्टर ते जैविक तकनीकें सने होरने अज्जे कल्लै दे खेततरे च सैह्योग गी बढावा देने लेई प्रमुख अमरीकी कंपनिं दे मुख कार्जकारी अधिकारिं कन्नै गल्लबात करगंन। अपने दौरे दे खीरले ध्याड़े मोदी होर न्यूयार्क च संयुक्त राष्ट्र महासभा च भविक्ख सरबंधी शिखर सम्मेलन गी बी संबोधत करगंन।

<><><><><><>

CM Atishi

आम आदमी पार्टी दी वरिष्ठ लीडर आतिशी होर अज्ज दिल्ली दे मुखमंत्री दे तौर पर सगंध चुक्कगंन। सगंध समारोह राज निवास च आयोजित कीता जाग जित्थें दिल्ली दे उपराज्यपाल वी.के.सक्सेना होर आतिशी ते उंदे मंत्री परिषद गी औहदे ते राजदारी दी सगंध चुकांगन। राष्ट्रपति द्रौपदी मुर्मू होरें मुखमंत्री दे तौरा पर अरविंद केजरीवाल ते उंदे मंत्रिमंडल दा स्तीफा मंजूर करियै आतिशी ते 5 मंत्रिं गी सगंध चकाने गी मंजूरी देई दित्ती ऐ। एह मंत्री होंगन गोपाल राय, कैलाश गहलोत, सौरभ भारतवाज, इमरान हुसैन ते मुकेश अहलावत। आतिशी कालकाजी असैंबली सीटै थमां विधायक ऐ। बीजेपी दी सुषमा स्वराज ते कांग्रेस थमां शीला दिक्षित मगरा आतिशी दिल्ली दी त्री महिला मुखमंत्री होंगन।

<><><><><><>

CBI

केन्द्री पड़ताल अजेंसी सीबीआई नै दिल्ली दी अदालतै गी दस्सेआ जे उन्नै कथित जमीन बदलै नौकरी घोटाले सरबंधी मामले च राष्ट्री जनता दल दे नेता ते साबका रेल मंत्री लालू प्रसाद यादव खलाफ मुकदमा चलाने लेई केन्द्र सरकार थमां मंजूरी थोई गेदी ऐ। एहदे मगरा सीबीआई नै कल मंजूरी दे दस्तावेज दिल्ली दी रोज एविन्यू अदालत च जमा कराए। सीबीआई नै जानकारी दित्ती जे अजेंसी इस मामले कन्नै सरबंधी 30 होरने आरोपिं खलाफ मुकदमा चलाने दी मंजूरी गी बलगा करदी ऐ। अजेंसी नै मंजूरी लेई 15 होरने दिनें दी मोहलत मंगी ऐ। जेहदे पर अदालत नै अगली सुनवाई 15 अक्टूबर तोड़ी मुलतवी करी दित्ती ऐ। एह मामला 2004 थमां 2009 बश्कार आरजेडी नेता लालू प्रसाद यादव हुंदे आस्सेआ केन्द्री मंत्री दे तौरा पर जमीन दे बदले नौकरियां देने कन्नै जुड़े दा ऐ। इस दरान जमीन दे बदले मध्यप्रदेश दे जबलपुर च स्थित रेलवे दे पच्छम मध्य जोन च लोकें दी ग्रुप-डी च

नियुक्तियां कीतियां गोइयां। इस मामले च अदालत नै 19 तरीक गी लालू प्रसाद यादव ते बिहार दे साबका उपमुख्यमंत्री तेजस्वी यादव गी अदालतै च पेश होने दा समन जारी कीता हा।



Srilanka Election

श्रीलंका च राष्ट्रपति चुनाएं लेई मतदान जारी ऐ। इक करोड़ 17 लख थमां बद्ध मतदाता मुल्खे दे 9में राष्ट्रपति गी चुनने लेई अपने मत-अधिकार दा इस्तेमाल करगंन। 2022 च आए दे आर्थिक संकट मगरा श्रीलंका च राष्ट्रपति लेई एह पैह्ला चुनां होआ'रदा ऐ। कोलंबो गिमां साढ़े संवाददाता नै खबर दितती ऐ जे मतदान बडलै 7 बजे शुरू होआ ते संजा साढ़े 4 बजे तोड़ी चलोग। मतदान लेई 13 ज्हार 400 केन्द्र बनाए गेदे न। मतदान प्रक्रिया गी सुचारू बनाने लेई पुलस, विशेष काय बल ते फौज थमां 60 ज्हार जवानें गी तैनात कीता गेदा ऐ। राष्ट्रपति दे औहदे लेई 38 मेदवार चुनावी मैदान च न। पर मुख्य मकाबला राष्ट्रपति रानिल विक्रमसिंघे विरोधी पार्टी दे लीडर साजित प्रेमदासा ते खब्बे पक्खी नेता अरुणा कुमारा बशकार ऐ।



Israel

लैबनान दे आतंकवादी गुट हिजबुल्ला नै कल राजधानी बेरूत दे दक्खनी उपनगरीय इलाके च होए दे इजराइली हमले च अपने सिरें दे कमांडर इब्राहिम अकील दे मारे जाने दी तसदीक कीती ऐ। लैबनान दे सेहत मंत्रालय नै दस्सेआ ऐ जे दहिया इलाके च होए दे हमलें च घट्टोघट्ट 14 लोक तारे गे ते 66 जने घायल होइ गे। खबरें मूजब अकील दी लोथ हिजबुल्ला दे एलीट बल राडवान फोर्स दे 7 होरने सदस्येंदी लोथें कन्नै बरामद होई। एह इस ब'रे बेरूत पर इजराइल दा त्रीया हमला हा। लैबनान दे प्रधानमंत्री नाजिब मिकाती होरें घनी आबादी आले इलाके च होए दे इस हमले दी निंदेआ कीती ऐ। इजराइली हमले दे परते च हिजबुल्ला नै पच्छमी गलिलि इलाके च 100 शा मते राकेट दागे ते उत्तरी इजराइल च इक प्रमुख खूफिया ठकाने गी नशाना बनाया। तोआई संयुक्त राष्ट्र सुरक्षा काउंसल नै इक एमरजेंसी बैठक च हिजबुल्ला ते इजराइली फौज बयकार हिंसा भड़काने दे मुद्दे पर बचार बमर्श कीता ऐ।



Bharat Nepal

रेल मंत्री अश्विनी वैष्णव होरें कल नमीं दिल्ली दे हजरत निजामुद्दीन रेलवे स्टेशन थमां भारत-नेपाल मैत्री यात्रा सैलसफा रेलगड्डी गी झंडी दस्सियै रवाना कीता। 10एं दिने दी एह भारत ते नेपाल च केई धार्मिक थाहरें दे दर्शन करोआग। इनें 10एं दिनें दरान सैलानिएं गी भारत च अयोध्या, वाराणसी ते सीतामदी ते नेपाल च जनकपुर, काठमांडु ते पोखारा च धार्मिक ते विरासती थाहरें दे दर्शन करोआए जांगन।



Announcement in Dogri

आकाशवाणी जम्मू दा क्षेत्रीय समाचार एकांश 18 सितंबर, 2024 कोला त्रऊं गेडे च होआ करदे विधानसभा चुनाव 2024 दे सिलसिले च जम्मू संभाग दे सब्बने 10 जिले दे बारे च विशेष जिला प्रोफाइल कार्यक्रमें दी इक्क श्रृंखला प्रसारित करार दा ऐ। इस सिलसिले च अजे तोहड़ी, डोडा, किशतवाड़, रामबन ते अज्ज बड्डलै रजौरी जिलें पर आधारित कार्यक्रम बी प्रसारित कीते जाई चुके दा ऐ ते हुन औंदी 22 सितम्बर गी पुंछ जिले पर आधारित विशेष कार्यक्रम दा प्रसारण कीता जाहग। एहदे परैन्त इस्सै म्हीने दी 24, 26, 27, 28 ते 30 सितंबर गी बडले 8:45 बजे बाकी रौहदे जिलें पर आधारित कार्यक्रम बी प्रसारित कीते जागन जिनदे च जम्मू संभाग दे इनें जिले दा ऐतिहासिक, पर्यटन ते राजनीतिक अवलोकन पेश कीता जाग स केंद्र शासित प्रदेश च होआ करदे विधानसभा चुनाव दे मद्देनजर, शुरू कीती गेदी इस श्रृंखला दा मकसद आकाशवाणी जम्मू दे श्रोताएं लेई जम्मू संभाग दे सब्बने 10 जिले दे हर इक्क विधानसभा क्षेत्र दे बारे च महत्वपूर्ण जानकारी प्रसारित करना ते उने गी जागरूक रखना ऐ।



Chess

भारत नै हंगरी दे बुड्डापेस्ट च खेड्डी जा'रदी चैस ओलंपियाड दे 9में गेड च उजबेगिस्तान खलाफ 2-2 कन्नै मैच ड्रा खेड्डेआ ऐ। भारती टीम चैस ओलंपियाड च अजे तोड़ी अपराजित रेई ऐ ते 17 अंकें कन्नै शीर्ष पर ऐ।